

LIAFUAN SANULU ALIANSA NIAN (Ex. 20,1-17)

G: Liafuan sanulu mai husi Maromak nia obra ba nia oan sira nia libertasaun integrál: «Ha'u hasai ó husi moris atan!». Dekálogo (dêka lògoi = dêka=sanulu; lògoi=liafuan) mak oferta ida aliansa nian.

L1: Katesizmu Kreda Katólika nian fó hanoin katak: “Ukun-fuan sanulu fó sai ezijênsia sira domin ba Maromak no ba maluk. Tolu uluk refere prinsipalmente ba domin Maromak nian no hitu seluk ba domin maluk nian” (2067).

L2: Ukun-fuan sanulu mak:

- ☆ “sín” ba Maromak ne'ebé fó sentidu ba moris (ukun-fuan tolu uluk);
- ☆ “sín” ba família (ukun-fuan IV);
- ☆ “sín” ba vida (ukun-fuan V);
- ☆ “sín” ba domin responsavel (ukun-fuan VI);
- ☆ “sín” ba solidariedade, ba responsabilidade sosiál, ba justisa (ukun-fuan VII);
- ☆ “sín” ba lia-loos (ukun-fuan VIII);
- ☆ “sín” ba respeito ba ema seluk no ba buat ne'ebé ninia (ukun-fuan IX no X).

L3: Ukun-fuan sanulu mak fatuk-sikun moris morál povu sarani nian. Observa ukun-fuan sira mak hahalok ida domin nian ba Maromak ne'ebé hadomi ita.

KNANANUK BA ESPOZISAUN S. SAKRAMENTU: *Deus de Amor*

*Amor tão grande, Profundo e Sublime
Este é o amor do meu Criador
Não há nada no mundo, que possa igualar-se
Ao terno amor do meu Bom Jesus.*

*Deus de Amor, Deus de Amor
Oh Deus de Amor, Oh Deus de Amor
Tu és o único, Tu és o único
Oh Deus de Amor, Oh Deus de Amor
Não há outro Deus, Não não há
Fora de Ti, Fora de Ti
Fora de Ti, Para mim
Para mim, Para mim
Não há Amor.*

Só Ele nos Ama, nos compreende e nos guarda
De todos os males que existem aqui
Por isso O Adoro, com toda a minha alma
Porque me deu o Senhor doce calma.

(Adorasaun pesoál iha silênsiu)



G: Ita invoka Maromak ho Charles De Foucauld nia liafuan sira: *Ha'u Aman, ha'u abandona an ba ita: halo iha ha'u buat ne'ebé Ita hakarak! Buat naran de'it Ita halo mai ha'u, ha'u agradece Ita.*

MAROMAK NIA LIAFUAN

Husi livru Êxodo nian (20,1-3.7-8.12-17)

«Iha loron hirak ne'ebá, Maromak dehan liafuan hirak ne'e hotu: «Ha'u mak Na'i, ó-nia Maromak; Ha'u mak hasai ó husi Egipto rain, husi uman atan fatin. Ó la iha tan maromak seluk; mak Ha'u de'it. Ó la bele badaen naran ilas buat lalehan tutun nian ida, eh rai nian, eh bee rai-okos nian. Ó keta suku-tuut ba rai hana'i ba sira. Ha'u ó Na'i, ó Maromak ne'ebé hakarak hana'i de'it ba Nia. Ema sira be heuai hHa'u, Ha'u sei kastigu oan ho bei-oan ba bei-oan siram tan aman-inan sira salan; maibé, sira ne'eb'é hadomi Ha'u, halo tuir Ha'u-nia ukun-fuan, Ha'u sei hatudu laran-luak ba sira-nia bei-oan rihun ba rihun. Ó keta temi Na'i, ó nia Maromak naran, atu tahan lia ne'ebé hun-abut la iha, basá, Na'i fó kastigu ba ema ne'ebé temi nia naran hanesan ne'e. Ó sei hanoin nafatin loran sábadu, atu ó bele halo nia sai santu. Iha loron neen nia laran, mak ó sei kaer ó knaar, hodi halo buat hotu ne'ebé ó iha atu halo. Maibé, bain-hitu, loran hamahan-an nian, loran ó Na'i, ó Maromak nian. Ó, ó-nia oan-mane eh oan-feto, ó atan-mane eh atan-feto, ó-nia balada dian sira, eh ema sira rai seluk be horik ho ó, la bele halo naran serbisu ida. Basá, Maromak halo lalehan, rai, tasi no buat hotu ne'ebé sira iha, iha loran neen nia laran; maibé, to'o bain-hitu nia hamahan-An. Tan ne'e mak, Na'i haraik bensan, hodi halo santu loran sábadu. Ó sei hamta'uk ó aman no inan; halo nune'e, ó-nia moris sei naruk iha rai ne'ebé Na'i, ó-nia Maromak atu haraik ba ó. Keta oho, keta halo adultériu. Keta na'ok, keta foti lia-bosok hodi kesar ema. Keta kaan ema nia uman, keta kaan ema nia kaben no ema nia atan mane eh atan feto, karau eh kuda, naran buat ida ne'ebé ema nia soin»

SALMU 18

*Laran metin ba Na'i Maromak, ha'u moris Ita lia.
Ita lia mai nafatin, ho nia ha'u titu deit.*

1. Ba sira klamar moos ksolok tebes, sira be tuir Maromak ukun-fuan; ba sira be tuir Nia ukun ksolok boot, buka Nia ho laran di'ak.
2. Ha'u klamar latan ba rai rahun, ho Ita futar lia ha'u moris fali; ha'u klamar laran susar tebes, fó ksolok ha'u ho Ita liafuan.
3. Ha'u hili dalan loos no di'ak nian. Tuir uluk Ita ukun no hakarak. Sei tuir nafatin dalan Na'i Maromak bainhira ha'u iis seidaok kotu.
4. Ha'u haksolok tebes iha susar laran, tan Ita lia fó moris h'ias ha'u fuan; maski kalan ha'u hanoin Ita naran, buka tuir nafatin Ita nia hakarak.

KOMENTÁRIU

Fiar, ita hatene didi'ak, la'ós buat ruma ita hetan ho modu definitivu hodi rai di-di'ak iha armáriu besi nia laran bainhira ita hetan ona: fiar mak dalan ida, no la'ós dalan hakmatek ida: iha momentu ne'ebé la'o neineik, iha krize, iha parajen, iha

tentasaun sira no buat hotu ne'e halo parte iha viajen fiar nian.

Liuliu, bainhira foin hahú dalan, ita presiza simu tulun, presiza ema gia, no korrije mós bainhira nesesáriu: Maromak hatene didi'ak ida-ne'e, Nia hatene ita-nia frajilidade, nune'e mós Nia hatene didi'ak Inimigu Aaat ninia matenek bobar nian hodi buka okaziaun hotu atu halo ita laran rua-rua.

Tanba ne'e mak Maromak hanoin kona-ba instrumentu ida, Ukun-Fuan, atu eduka ita neinek ba liberdade loos: liberdade ida ne'ebé la limita de'it atu la halo aat, maibé empena ita atu hari'i no habelar hahalok di'ak.

Ukun-Fuan Sanulu garante ba ema espasu, tempu, kondisaun sira atu nia bele dezentolve talentu sira Maromak haraik ba nia. Ne'e mak meta eh finalidade husi regra sira iha Dekálogu (Lia-fuan Sanulu), tulun boot atu ita bele kaer metin bainhira ita lakon direasaun eh búsula, bainhira babeur sira distrasaun nian, inkonstánsia nian, buka fó razaun ba salan sira foti entuziazmuinisiál nia fatin.

Ho pasiénsia no hodi la moe atu la'o ain-hakat rua bá oin no ida bá kotuk, ita tau konfiansa ba instrumentu Ukun-Fuan Sanulu ne'e bainhira ita haree katak ita hetan difikuldade!

MAJISTÉRIU PAPA FRANCISCO NIAN

Husi Fratelli Tutti – Leitura pesoál (Lee Kapítulu III tomak iha semana laran)

103. Fraternidade la'ós de'it rezultadu husi kondisaun sira iha-ne'ebé ema respeita liberdade individuál sira, no la'ós de'it prátika ruma igualdade nian. Maska buat sira-ne'e mak kondisaun ne'ebé halo sai posivel, la to'o atu hamosu nu'udar rezultadu nesesáriu ba fraternidade. Fraternidade iha buat ruma pozitivu atu oferese ba liberdade no ba igualdade. Saida mak sei akontese bainhira la kuda fraternidade ho modu konxiente, bainhira la iha vontade política fraternidade nian, tradús ba edukasaun ba fraternidade, ba diálogu, ba deskoberta resiprosidade no hariku-malu nian nu'udar valór sira? Sei halo liberdade sai klood, ho rezultadu kondisaun ida solidaun nian, autonomia pura atu pertense ba ema ruma eh ba sasán ruma, eh atu posui de'it no uza. Ida-ne'e la hakohak liberdade nia rikusoin tomak, basá liberdade liuliu orienta ba domin.

104. Ema la atinje liberdade mós hodi define ho modu abstratu, katak «ser umanu hotu hanesan», maibé liberdade mak rezultadu husi kultivu konxiente no pedagójiku fraternidade nian. Ema sira ne'ebé hatene de'it sai sósiu, kria mundu ne'ebé taka-metin. Iha eskema hanesan ne'e, sá loos sentidu ne'ebé ema ida ne'ebé la hola parte ba sirkulu sósiu sira-nian bele iha no mai ho mehi ba moris ida di'ak liu ba an rasik no ba ninia família?

105. Individualizmu la halo ita sai livre liután, la halo ita hanesan liután, la halo ita sai maun no biin-alin liután. Tau hamutuk interese individuál de'it la iha kbiit atu hamosu mundu ida di'ak liu ba umanidade tomak. Labele mós prezerva ita husi aat bara-barak, ne'ebé sai globál ba beibeik. Maibé individualizmu radikál mak vírus difisil liu atu manán. Nia lohi. Nia halo ita fiar katak buat hotu konsiste iha kore ambisaun raisk nia talin sira, hanesan fali, hodi akumula ambisaun sira no seguransa individuál sira mak ita bele hari'i di'ak komún.

INVOKASAUN NO KNANANUK: *Adoramus Te, Domine (Taizé)*

- ☆ Hela ho ha'u, Na'i: basá ha'u frajil liu no presiza Ita-nia tulun no Ita-nia kbiit atu keta monu beibeik.
- ☆ Hela ho ha'u, Na'i: basá Ita mak ha'u moris, lahó Ita ha'u-nia fervór sai malirin.
- ☆ Hela ho ha'u, Na'i: basá Ita mak ha'u roman, lahó Ita ha'u hela iha nakukun.
- ☆ Hela ho ha'u, Na'i: atu ha'u rona Ita lian no tuir Ita.
- ☆ Hela ho ha'u, Na'i: basá: atu ha'u haklaken ba ema hotu katak Ita mak Maromak salvasaun nian.
- ☆ Hela ho ha'u, Na'i: atu Ita hatudu mai ha'u Ita hakaran hotu.
- ☆ Hela ho ha'u, Na'i: atu ha'u lori Ita ba ema hotu ha'u hasoru iha ha'u dalan.
- ☆ Hela ho ha'u, Na'i: basá ha'u hakarak hadomi maka'as Ita no moris ho Ita ba nafatin.
- ☆ Hela ho ha'u, Na'i: basá maski ha'u klamar kiak liu, ha'u hakarak sai ba Ita fatin ida konsolasaun nian, jardín taka-nian ida, knuuk ida domin nian, iha-ne'ebé Ita sei la hadook An ba nafatin.
- ☆ Hela ho ha'u, Na'i: basá ha'u hakarak atu ema seluk haksolok ho Ita prezensa iha ha'u.
- ☆ Hela ho ha'u, Na'i: se Ita hakarak ha'u fiél ba ita.

ORASAUN FINÁL

Ha'u presiza Ita, ha'u Maromak,
maski ha'u la buka nafatin Ita.
Ha'u presiza sente katak Ita hadomi no perdua ha'u.
Ha'u presiza sente Ita besik ha'u hanesan aman ida,
maski ha'u la komporta an hanesan oan.
Ha'u presiza Ita, ha'u Maromak
tanba Ita de'it mak bele halakon ha'u salan
ne'ebé impede ha'u sai transparénsia.
Ha'u Maromak, ha'u presiza Ita.

KNANANUK REPOZISAUN NIAN: STRONG AND CONSTANT

1. I will be Yahweh who walks with you.
You will be always within my hand!
Take your heart and give it all to Me!
Strong and constant is my love (2x)
2. Should you wander far away from Me,
I will search for you in every land.
Should you call, then you will truly know:
3. When you know sorrow within your life,
I will come; I will embrace your heart!
Through your pain you will discover me!

